

"RASULULLAH Sallallahu Alaihi Wasallam bersabda : Maksudnya :
 "Dari Abdul Rahman bin Abi Bakrah dari ayahnya, seorang lelaki telah
 berkata : Wahai Rasulullah siapakah sebaik-baik manusia? Rasulullah
 bersabda : Sebaik-baik manusia ialah orang yang dipanjangkan
 umurnya dan umurnya itu dipergunakan untuk berbuat kebajikan.
 Berkata lelaki itu lagi : Siapakah sejahat-jahat manusia? Rasulullah
 bersabda : Sejahat-jahat manusia ialah orang yang dipanjangkan
 umurnya tetapi digunakannya untuk berbuat kejahatan".



NASIONAL

HARI SABTU 2 MAC 2024 25

SEMINAR KEBANGSAAN PENDIDIKAN MELAYU ISLAM BERJAYA SEMARAK HARI KEBANGSAAN, 2 MAC

Oleh : Nooratini Haji Abas
 Foto : Dk. Nur Hafilah Pg. Osman

BANDAR SERI BEGAWAN.
 Khamis, 29 Februari. - Seminar Kebangsaan Pendidikan Melayu Islam Beraja Semarak Hari Kebangsaan sempena Sambutan Ulang Tahun Hari Kebangsaan Negara Brunei Darussalam Ke-40 akan diadakan pada Sabtu, 2 Mac 2024 bertempat di Auditorium, Balai Khazanah Islam Sultan Haji Hassanah Bolikiah.

Sehubungan dengan itu, satu Sidang Media mengenai diadakan pagi tadi di Galeri Tiga Dekad, Tingkat Bawah, Pusat Sejarah Brunei (PSB), yang disampaikan oleh Pengarah Pusat Ilmu Teras, Kolej Universiti Perguruan Ugama Seri Begawan (KUPU SB), Dr. Haji Noralizam bin Haji Aliakbar selaku Pengerusi Bersama Seminar, dan Pemangku Timbalan Pengetua PSB, Awang Muhammad Syahmi bin Halimshah.

Menurutnya, seminar berkenaan merupakan anjuran KUPU SB melalui Pusat Ilmu Teras dengan kerjasama PSB dan Pejabat Sekretariat Majlis Tertinggi Melayu Islam Beraja (MTMIB).

Dr. Haji Noralizam seterusnya menjelaskan hadir selaku tetamu kehormat dan seterusnya merasmikan seminar berkenaan nanti, Timbalan Menteri (Urustadbir Perkhidmatan Awam) di Jabatan Perdana Menteri (JPM), Yang Mulia Dato Seri Paduka Awang Mohammed Riza bin Dato Paduka Haji Mohammed Yunos.

"Dengan tema 'Memperkasakan Penghayatan Amalan dan Nilai-nilai Melayu Islam Beraja (MIB) Ke Arah Mencapai Wawasan Brunei 2035', seminar berkenaan dianjurkan adalah bagi menjunjung tinggi titah Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam semasa Sambutan Israk dan Mikraj pada 2019 dan baginda menegaskan bahawa Negara Brunei Darussalam (NBD) adalah sebuah negara yang akan sentiasa mementingkan ibadat kepada Allah Subhanahu Wata'ala dan seterusnya dipandu oleh sistem MIB yang telah berjalan sejak ratusan tahun.

"MIB berfungsi memelihara dan menjamin semua hak rakyat dan penduduk di negara ini serta telah terbukti berjaya menjelmakan sebuah negara yang adil, bahagian dan bersatu padu, iaitu NBD.

"Oleh yang demikian, melalui seminar berkenaan diharap dapat membantu memperkukuh lagi kefahaman MIB dalam kalangan masyarakat, seterusnya menekankan kepentingan mengekalkan, mempertahankan dan menghayati amalan serta nilai-nilai MIB," tambahnya lagi.

Beliau seterusnya berkata seminar berkenaan nanti akan dimulakan dengan ucapan bertajuk 'Memperkasakan Penghayatan Amalan dan Nilai-nilai MIB Ke Arah Merealisasikan Wawasan Brunei 2035' yang akan disampaikan oleh Dato Paduka Dr. Haji Abdul Latif bin Haji Ibrahim.

Menurutnya lagi, sebanyak lima

kertas kerja akan dibentangkan pada sesi pagi seminar berkenaan, iaitu kertas kerja I bertajuk 'Strategi Penerapan dan Pengukuhan Amalan dan Nilai-nilai MIB Dalam Kalangan Generasi Muda' disampaikan oleh Profesor Dr. Haji Awang Asbol bin Haji Mail dari Akademik Pengajian Brunei (APB), Universiti Brunei Darussalam (UBD); kertas kerja II disampaikan oleh Ra'ees KUPU SB, Dr. Awang Haji Adanan bin Haji Basar, bertajuk 'Pemantapan Sistem Pendidikan Islam Dalam Mengukuhkan Falsafah MIB'.

Seterusnya beliau menambah, kertas kerja III bertajuk 'Tantangan Dunia Globalisasi dan Implikasinya Terhadap Pengamalan Nilai-nilai MIB' disampaikan oleh Profesor Ampuan Dr. Haji Ibrahim bin Ampuan Haji Tengah dari APB, UBD; kertas kerja IV dengan tajuk 'Sejarah dan Latar Belakang MIB' disampaikan oleh Pengetua PSB, Dr. Haji Muhammad Hadi bin Muhammad Melayong; dan kertas kerja V bertajuk 'MIB Mengukuhkan Perkhidmatan Awam Dari Aspek Pendidikan' disampaikan oleh Yang Di-Pertuan Persatuan Sejarah (PESEBAR), Dr. Haji Mohd. Rozan bin Dato Paduka Haji Mohd. Yunos.

Pada sesi petang seminar pula jelasnya, akan diadakan Forum Khas bertajuk 'Pelestarian Pendidikan MIB Dalam Menghadapi Hambatan Dunia Kontemporari' dan akan dibincangkan bersama oleh ahli panel terdiri daripada Pemangku Timbalan Ra'ees, KUPU SB, Dr. Haji Abang Hadzmin bin Haji Abang Taha; Penolong Rektor



SIDANG Media mengenai Seminar Kebangsaan Pendidikan Melayu Islam Beraja Semarak Hari Kebangsaan disampaikan oleh Pengarah Pusat Ilmu Teras, Kolej Universiti Perguruan Ugama Seri Begawan (KUPU SB), Dr. Haji Noralizam bin Haji Aliakbar selaku Pengerusi Bersama Seminar dan Pemangku Timbalan Pengetua PSB, Awang Muhammad Syahmi bin Halimshah.

(Penyelidikan, Antarabangsa dan Perkhidmatan) Universiti Islam Sultan Sharif Ali (UNISSA), Dr. Arman bin Haji Asmad; dan Profesor Dr. Haji Awang Asbol bin Haji Mail dari APB, UBD.

"Sementara, hadir selaku tetamu kehormat pada majlis penutup seminar nanti ialah Setiausaha Tetap (Urustadbir Perkhidmatan Awam), JPM, Awang Ajman bin Haji Meludin.

"Seminar berkenaan menyasarkan peserta terdiri daripada pegawai dan kakitangan

kementerian-kementerian, ahli akademik dan para pelajar dari Institut Pengajian Tinggi Pendidikan, sekolah-sekolah, masjid-masjid dan ahli persatuan-persatuan.

"Bagi maklumat lanjut dan sebarang pertanyaan, dipersilakan untuk menghubungi Setiausaha Bersama Seminar, Awang Mohammad Muslihuddin Syah bin Haji Mustafa, menerusi talian +673 8628213 atau e-mel muslihuddin.mustafa@kupu-sb.edu.bn," ujarnya lagi.